

Transkript sa konferencije za medije međunarodnih organizacija

OHR, Mario Brkić

OSCE, Aida Bešić

EUFOR, Nicholas Foster

OHR

Schwarz-Schilling u posjeti Sjedinjenim Američkim Državama

Visoki predstavnik i specijalni predstavnik Evropske unije, Christian Schwarz-Schilling danas putuje u trodnevnu posjetu Sjedinjenim Američkim Državama tokom koje će boraviti u New Yorku i Washingtonu.

Osnovni cilj ove posjete je njegovo sutrašnje obraćanje Vijeću sigurnosti UN-a, tokom kojeg će visoki predstavnik i specijalni predstavnik EU prezentirati analizu situacije i napretka ostvarenog u Bosni i Hercegovini tokom proteklih šest mjeseci, odnosno od njegovog prethodnog obraćanja Vijeću sigurnosti UN-a.

U svom obraćanju, visoki predstavnik i specijalni predstavnik EU također će govoriti o statusu decertificiranih policajaca i apelirati na Vijeće sigurnosti UN-a da riješi ovo pitanje.

Kopija njegovog govora biće vam sutra na raspolaganju.

U New Yorku će gospodin Schwarz-Schilling imati niz sastanaka, uključujući sastanak s Jean-Marie Guéhennom, zamjenikom generalnog sekretara za mirovne misije UN-a.

Visoki predstavnik i specijalni predstavnik EU će iz New Yorka otputovati u Washington gdje će se sastati s nekim od najviših

zvaničnika State Departmenta i Nacionalnog vijeća za pitanja sigurnosti, uključujući i Daniela Frieda, pomoćnika državnog sekretara za Evropu, Clintu Williamsona, ambasadora za pitanja ratnih zločina i Judy Ansley, višeg direktora za evropska pitanja.

Visoki predstavnik/specijalni predstavnik EU čestitao Predsjedništvu BiH

Visoki predstavnik/specijalni predstavnik EU, Christian Schwarz-Schilling je čestitao članovima Predsjedništva BiH – Željku Komšiću, Nebojši Radmanoviću i Harisu Silajdžiću, na jučerašnjoj inauguraciji i zaželio im uspjeh u naredne četiri godine.

Novi zamjenik visokog predstavnika preuzima Ured OHR-a u Banja Luci

Novi zamjenik visokog predstavnika, gospođa Clarisse Pasztory, će danas otputovati u Banja Luku kako bi preuzela dužnost šefa Ureda visokog predstavnika u Banja Luci.

Gospođa Pasztory je austrijski državljani i ima dugogodišnje iskustvo koje je stekla radeći na različitim funkcijama na području Balkana.

Od 2004. godine je radila na Kosovu, prvo kao politički savjetnik ličnog izaslanika visokog predstavnika za zajedničku vanjsku i sigurnosnu politiku EU, zatim kao glasnogovornica Prelazne administrativne misije UN-a na Kosovu, a u zadnje vrijeme kao politički savjetnik tokom pregovora o statusu Kosova.

Tokom perioda od 2001. do 2004. godine, Clarisse Pasztory je radila u Skoplju obavljajući dužnost višeg političkog savjetnika u Uredu specijalnog predstavnika Evropske unije u

Makedoniji.

U ranijim fazama njene političke karijere Clarisse Pasztory radila je na različitim funkcijama u Austriji.

Clarisse Pasztory će preuzeti dužnost od Kate Fearon, koja je od augusta ove godine bila na funkciji vršitelja dužnosti šefa Ureda visokog predstavnika u Banja Luci.

OSCE

Delegacija bh. službenika iz oblasti obrazovanja u posjeti Sjevernoj Irskoj

Osam članova Koordinacionog odbora za implementaciju Privremenog Sporazuma o zadovoljavanju posebnih potreba i prava djece povratnika kao i predstavnici OSCE-ovog Odjela za obrazovanje, otputovali su jučer, 6. novembra 2006, u četverodnevnu studijsku posjetu Sjevernoj Irskoj. Studijsku posjetu organizirala je Misija OSCE-a u BiH, u saradnji s UNESCO-vim Centrom Univerziteta Ulster.

Tokom svog boravka, učesnici će posjetiti osnovne i srednje škole, gdje će se sresti s predstavnicima UNESCO-vog Centra i predstavnicima obrazovnih institucija Sjeverne Irske. Obrazovni sistem u Sjevernoj Irskoj još uvijek u velikoj mjeri odražava dvije različite kulturne tradicije. Ipak, sve škole dobijaju državna sredstva, i sve moraju primjenjivati zajednički nastavni plan i program.

Glavni cilj ove posjete je posmatranje najboljih iskustava u razvoju zajednicakojeučezajedno, kao i prepoznavanje mogućih rješenja za obrazovni sistem Bosne i Hercegovine. Ova posjeta također može ukazati na to kako napraviti obrazovni sistem koji će biti otvoreniji, kulturno različitiji i koji odgovara potrebama i interesima svih učenika u Bosni i Hercegovini.

EUFOR

Žetva za sigurniju budućnost

Ovog vikenda EUFOR je, zahvaljujući pomoći građana BiH, izuzeo dodatne količine nezakonitog naoružanja u lokalnim zajednicama kako bi ono bilo uništeno na siguran način. U okviru kampanje "Žetva", koju zajednički provode civilna zaštita, lokalna policija i EUFOR, u subotu je prikupljeno 2.500 komada municije i 14 ručnih bombi u Poklečanima i Hadžićima. U nedjelju je u Doboju, na lokaciji za prikupljanje, jedan muškarac predao vreću sa 15 ručnih bombi na sigurno uništenje.

Višak nezakonitog naoružanja i municije i dalje izaziva nesreće u kojima često stradaju djeca. Kao i većinu drugih nesreća, i ove je moguće izbjeći. Svako ko posjeduje informaciju o mjestu na kom se nalazi nezakonito oružje ili municija treba obavijestiti lokalnu policiju ili ured civilne zaštite kako bi se osiguralo njihovo sigurno uništenje.

EUFOR izražava pohvale za podršku i povjerenje koje su pojedinci ukazali policiji, civilnoj zaštiti i EUFOR-u u ovom procesu i smatra da takvi postupci svima pokazuju da raste povjerenja građana u sigurno i stabilno okruženje i napredak koji u tom pravcu ostvaruju vlasti BiH.

Novinarska pitanja:

Žana Kovačević, Radio Slobodna Evropa:

Za OHR. Šta će biti tema razgovora u Vašingtonu?

OHR:

Teme su reforme u Bosni i Hercegovini. Više detalja ćemo imati u narednim danima. Visoki predstavnik je sutra u Americi.